

Ikiaroorartup cannabis-ip inerteqqutaajunnaarsinneqarpat pitsaaqutai aammalu ajoqutai misissuiffiqeqarnissaat siunertaralugu Naalackersuisut nassuiaammik suliaqaqqullugit Inatsisartut aalajangiiffiqisassaattut siunnersuut. Nassuiaat cannabis-ip qanoq inerteqqutaajunnaarsinneqarsinnaanera aammalu qanoq tuniniarsinnaaneranik imaqaassaaq kingusinnerpaamillu ukiakkut 2024-imi Inatsartunut tunniunneqassaaq. Nassuiaat kingusinnerpaamik UKA 2024-mi inatsisartunut saqqummiunneqassaaq.
(Inatsisartuni ilaasortaq Kristian Jeremiassen, Inuit Ataqatigiit)

Akissuteqaat

(Meeqqanut, Inuusuttunut, Ilaqutariinnut Peqqissutsimullu Naalackersuisoq)

Siullermeerneqarnera

Aallaqqaasiutigalugu Inatsisartunut ilaasortaq Kristian Jeremiassen, Inuit Ataqatigiit, aalajangiiffiqisassatut siunnersuutaanut Naalackersuisut sinnerlugit qujassuteqarfigissavara.

Naalackersuisut isumaqarput cannabissimik unioqutitsilluni nunatsinnut eqqussuisarneq ajornartorsiutaasoq annertooq. Cannabissimik unioqutitsilluni nioqquteqartarnerit kingunerisaanik innuttaasut ilaqutariillu inuttut aningaasaqarnikkullu annertuumik eqqugaasartut siunnersuuteqartumit isumakuluutigineqarmata Naalackersuisunit paasillaarsinnaavarput. Aningaasarpasuitaaq ilisimangisatsinnik annertussusillit nunatsinnit annissuunneqartarneri Naalackersuisunitaaq isumakulunnartinneqarpoq. Aningaasat inuiaqatigiinnut iluaqutissanngorlugit nunatsinni kaaviiartinneqartussaagaluartut.

Cannabis-imik atuinerup peqqinnissakkut inuttullu ajoqutaasinnaanera ilisimavarput. Tassanngaannartumik sivisuumillu atugaasartunik ajoqusiinnaasarpoq soorlu pinngitsuuisinnaajunnaarnikkut annilaangalersarnikkut, uippakajaartalernikkut naartusinnaajunnaarnikkullu tamatumalu saniatigut anersaartuutigut nappaateqalernermik tassunga ilanngullugu kræfteqalernermik kinguneqarsinnaalluni. Cannabis-imik atuinikkut eqqaamasaatsit eqqarsarsinnaassutsillu ajoquserneqarsinnaapput tamannalu ilinniakkamik ingerlatsiniarnermut suliassamik pisariusumilluunniit ingerlatsiniarnermi ajoqutaasinnaavoq¹.

Cannabisip inerteqqutaajunnaasagaluarpat iluaqutisissartai suusinnaanersut ilisimasagut naammariinngillat kisianni paasisaqaqqinnissaq ammaffigivarput.

Cannabis nunani allani assigiinngitsutigut inerteqqutaajunnaarsinneqarnikuuvoq. Nunat allat iliuuserisimasaat ineqqutaajunnarsitsinerullu kingorna ilisimalikkat nutaat paasisaqarfigissallugit Naalackersuisut soqutigintippaat.

¹ Sundhedsstyrelsen (2022) Cannabis som rusmiddel – Den aktuelle viden om rusvirkninger, skadevirkninger og udbredelse https://www.sst.dk/-/media/Viden/Stoffer/Oversigt-over-stoffer/SI%C3%B8vende-stoffer/Notat-om-cannabis.ashx?sc_lang=da&hash=AB0F87CDA3E1791103F4325CD7725703

Ukiuni kingullerni peqqinnissaqarfitta tatisimaneqaleraluttuinnarnera miserratisaanngilaq inuuneqqortusiartornerpullu taamaasillunilu ataavartunik nappaateqaleriartornerput ilutigalugu tatisimaneqartuassalluni. Cannabisimik atuineq inerteqqutaajunnaarsinneqarpat kingunerluutit peqqinnissaqarfimmik annerusumik artorsartitsinerulersinnaasut eqqumaffiginissaat pingaaruteqarpoq. Tamatuma saniatigut peqqinnissaqarfimmi peqqinnissakkut ilinniarsimasunik sulisussaqaarniarnikkut annertuumik ajornartorsiuteqarpugut. Sulisussaaleqinerup kingunerisaanik sulisut ataasiakkaat suliassaat amerlanerusut pisariunerusullu kisimiillutik isumagisalertussaassavaat innuttaasullu katsorsartinniartut utaqqinerusalissallutik. Pissutsit taamaattut Naalakkersuisunit akueriinnarneqarsinnaajunnaarput, taamaammallu taakku aaqqiissutissarsiorneqartariaqarlutik.

Peqqinnissaq pillugu Ataatsimiititaliarsuup isumaliutissiissutaa utaqqikatanneqartoq ataatsimiinnerup nalaani saqqummiunneqassaaq peqqinnissaqarfiullu ineriartorteqqinnissaanut nalerassatut atorneqarsinnaassalluni. Ineriartortitseqqinnissaq sakkortuumik imaannaanngitsumillu pingaarnersiuiffiussaaq.

Peqqinnissaq pillugu Ataatsimiititaliarsuup isumaliutissiissutaata saqqummiunneqarnera Peqqinnissamut Naalakkersuisoqarfimmut Peqqinnissaqarfimmullu ukiuni aggersuni nutaanik suliassaqartitsilissaaq peqqinnissap tungaatigut ataatsimiititaliarsuup isumaliutissiissutai misissoqqissaarneqarlutillu atuutsilersinneqartartussaammata. Isumaliutissiissut aqutigalugu inassuteqaatit pilersitaanik suliassat nutaat qanoq amerlatigissaneri ilisimaneqanngilaq. Peqqinnissaqarfiulli ilungersunartumik inissisimanerata malitsigisaanik suliassat pingaarnersiortariaqassapput. Nukiit inuiaqatigiit peqqissusaanut iluaqusiinerpaasussanngorlugit atorneqassapput.

Siuliani pineqartut aallaavigalugit Naalakkersuisut matumuuna allannguutissatut siunnersuummik saqqummiussipput:

Cannabisip inerteqqutaajunnaarsinneratigut pitsaaqutit ajoqutillu pillugit Naalakkersuisut nassuiaammik nalunaarusioqqullugit Inatsisartut aalajangiiffigisassaatur siunnersuut. Nassuiaat kingusinnerpaamik UKA2024-mi Inatsisartunut saqqummiunneqassaaq.

Nassuiaat inerteqqutaajunnaarsitsinissamut periarfissat pillugit suleriaqqinnissamut kissaateqartoqarnissaanik nassataqarpat, kingusinnerusukkat cannabisimik inerteqqutaajunnaarsitsinerup tuniniaanerullu qanoq ingerlanneqarsinnaanerannik pingaarnersiulluni nalunaarusiortoqarsinnaassaaq.